

钦定四库全书

集部五

静春堂集

别集类四

元

提要

（臣）等谨案静春堂集四卷元袁易撰易字通甫长洲人不求仕进部使者拟荐于朝谢不应行中书省署徽州府石洞书院山长旋亦罢归居吴淞县区之间筑堂曰静春聚书万卷手自校定或掉舟载笔床茶灶古器游于江湖赵孟俯尝为画卧雪图称易与龚璘郭麟孙为吴中三君子是集乃易歿之后其子泰所编延佑四年龚璘为之序推之甚至然以王安石拟之殊不相类卷末有厉鹗跋拟以黄陈亦未尽然易诗吐言天拔于陈与义为近与黄庭坚之镕铸剏削陈思道之深刻瘦硬其门径实各别也有元作者绮縠居多易诗虽所传无几而风骨遒上固足以高步一时龚璘等所作集序墨迹至明正统中尚存吴讷题其卷末深致向往盖其人品诗品均有动人遐想者矣

乾隆四十二年五月恭校上

总纂官 （臣）纪昀 （臣）陆锡熊 （臣）孙士毅

总校官 （臣）陆费墀

●静春堂诗集目录

卷一

过泰伯庙

游灵岩

酬汤师言昆山冬夜见寄

寄承天寺书记

水仙花

过定慧院寻陈舜咨不见

诸友约游虎丘不及往

游苏子美沧浪故园

登开元寺阁观浮海石佛

金鳳花

寄钱德钧德钧时在钱塘

赠竹径

梅隱院观鱼

寄汤师言倩德钧书数诗故章末及之

寓西隱庵师贤与唐月心相过分韵得然字

赠日者余竹深
胡西轩道院竹石
题陆义斋香远亭
送汤师言赴杭
送潘鹤臞归侍母
题束季博适安斋
送王沂父常州学正
赠昆山儒医张生
赠禽衍陆生
过长安堰
杭州客楼开炉日作
送汤师言番江书院山长
久出还家梅花已谢
和师言见寄

卷二

杭州道中言怀
重午客中
寄吴中诸友
 钱德钧
 萧子中
 汤师言
 唐希贤月心
 赵明仲
 冯景说
和送春韵
和月心韵
送赵明仲番江书院长仆时自石洞书院归
首夏村居杂兴七绝
八月一日雨后赋兼寄城中诸友
呈信州孟能静总管
题钱德钧水村图子昂仲宾二公作竹石于后
题渡海罗汉像
冬日感兴并怀德钧师言月心
杭州长至日会戴师爽张仲宾

次日雪中再用前韵

正月十六日与德钧子敬翼之泊儿子震游束季博山园赋诗五首

病目废书雨中独卧偶赋

湖上即事多怀月心之辞

题扇

唾壶

灯檠

麈尾

铁如意

白海青

寄孔退之

卷三

上张大学士

春日雪中

春日自城南归会二友观书人散后作

春日游废园

和师言游南园韵

送孔退之

送蔡松江之饶州石洞书院

送楼山长之石洞交代

与师言客钱塘凡三月余师言归后作诗奉寄

寒食日南山招饮马塍醉为马坠

与南山伯祥会饮湖中暮归书所见

自钱塘归寄诸友

自杭还吴访德钧因留论文过午归途过竹间道院

送屠存博去岁客杭一年多与存博游故诗意及之

邀师言过城南隐居不肯来已而雪作并寄姚子敬

题钱翼之所藏华岳山水图

次师言月夜见寄韵

春雨漫兴和

师言首夏杂兴并用书怀

雨后寄陆小山

和小山雨中见寄

和师言穷居即事韵

再次前韵

题画

来禽

瓜

黄葵

杏花

题钱仲昭家菊坡图

卷四

新岁郊居即事

村居即事

寄陆冶僊

和小山夏夜独坐

因公事留驿中遂登姑苏台晚望

秋夜怀友

和翼之秋怀

再和

赠周生

戏调月心

送府判常仲寬

送赵显之检校

挽陈彻堂

陈仲渊别室

别南山上人

独坐懷黃子久

郊居寓目随事辄题得诗九首

和师言病中止酒见寄韵

题赵明仲鄱阳行藁后

春日对雪即事寄师言

次月心见寄书懷

三月一日过南园报师言诸友

再用韵

和师言残春漫兴韵

●静春堂诗集原序

予读今文诗不知其为今人者唯于吾通甫为然通甫没十余年矣意者亦古矣而

犹今也今斯人岂易得哉世之为诗者学古人欲其似出己意欲其新两端而已然似者多蹈袭新者常崖异唯其似而非似也新而非新也得之浑然又未知古人已意孰先孰后也始可言诗耳一自士去科举之业例无不为诗北音伤于壮南音失之浮诗文不同宜极于古故今人于宋诗少所许可仅取王半山以其逼唐也然半山岂肯及唐而止三司与宋次道选诗尽在目中矣至于中夜禅悟集句趁胡笳拍则不啻自其口出一大家数造诣迥别殆未可以浅窥若唐人近接六朝凌鲍谢何必多遽挹西汉师苏李更不疑实致如此使如今人悬拟风雅不过局蹐四言如韦孟自陈束皙补亡曾何系于删后重轻哉声闻以时寢异感发在人则同每况愈下固不可心远而力不逮亦不可予于通甫既曰古之人岂必以半山枉通甫譬诸登峯造极循循来径尚于此乎见之也古人所尝有者皆有今人所当无者必无灵杰百出清婉明丽抑古谓酷令人爱者非耶忆通甫与予交上下古今一返诸性情之正予固望其鸣国家之盛横经石洞归而不复出静春堂手校万卷筑修亭遂志焉属其仲子泰辑遗编托予序死者如可作也顾焉得如通甫者与之评通甫名易姓袁氏吴郡人延佑庚申日南至高邮龚璘序

●钦定四库全书

静春堂诗集卷一

（元）袁易 撰

过泰伯庙

孤城下白日旻景射粉榆与客上河梁河水寒弥弥岿然吴泰伯灵琐瞰其址升堂
閤无人白云在廉陛淳风暨南服妾妇知敬止裡祀何寂寥庙食不饜簋至德贵辞让千
乘犹敝屣岂伊常人情簞食形慍喜吾尝悯僚光同室操剑匕神孙且沦薄流俗重已矣
伯也谅有灵愿言振颓靡玄踪企龙德懿化慕麟趾

游灵岩

绪风散林薄泄露开岩扃兹晨愜清穆旷怀延杳冥九折度峻壁微行穷绝陁夫差
昔戾止锵锵驻和铃华旗一以建缤纷朝百灵花飘磴道白树入端闾青吴娃煽方处越
甲蔽长垆千秋魂魄归过沛涕亦零呜呼重华后格斗何由宁秦宫委蔓草汉阙流寒萤
惟应金仙姿空山屹亭亭摩足耀八极象教垂千龄

酬汤师言昆山冬夜见寄

清昊悬白日灵景焕八荒维时星昴中宾饯由朔方夕曛落草头寒谷晦苍苍之子
在天末江湖阻且长济盈恐濡轨欲往悲无梁风吹昆冈裂念子单衣裳短札俄枉辱高
情何慨慷一辞三致意再歌婉成章要我数日期我怀增惋伤数日诂可玩百年亦易量
焉能□耿耿契阔如参商

寄承天寺书记【号此山】

赤城亘苍穹实维仙圣宅上人释门秀灵气载营魄浮杯渡三吴爰止双峨石白云
亦何心皓鹤时敛翮禅扃清呗余宴坐羣动寂断除前后际洞彻天人蹟我生游彀中忧

勤口怵惕北风过环堵落叶平地尺中宵念室家岁晚冻馁迫鬓髮能几何顾为儿女白
明当絕尘机从师振金策

水仙花

疾风吹长林急雪集丛竹飞仙从何来翩然贲空谷初逢恍若惊庄视矧敢黠黄裳
韞华藻素服立幽独昔闻贤达流沧波振遐躅太白御鲸背灵均葬鱼腹永伤骨为土缅
想人如玉贞魂千秋后流落依草木吾将佩幽芳采采不盈掬

过定慧院寻陈舜咨不见

城东古招提遗构何代作薜萝施栏楯流尘翳丹雘岌岌垠垣仆裊裊危柱弱举头
瞻金像古屋苍鼠落恭闻西方教冥念贵恬漠班荆双双树蔽芾亦可托迹来列万刹中
天峙飞阁隆规竞宏丽至道愈衰薄爰兹遗古意每过必枉策故人志云卧斯焉甘旅泊
儒墨岂磷缁寄食共藜藿踟蹰不及见心期怅何邈白云东北飞缥缈带皓鹤缅怀肥遁
姿清风在寥廓

诸友约游虎丘不及往

原畴拥危阜冈峦带重闳扪萝稍曲折身已跻嶙峋径蟠太古石崑栖百代云昔王
侈厚葬宏模难具陈玉匣闭鳬胫珠襦被龙文重险疲卒伍三泉愁鬼神雄图乍不灭伯
心寧肯泯遗基委劲越余孽开嬴秦金精既荡潏剑气亦沈湮薄游羨良友览物酬芳春
龙收灵雨旦虎啸清风晨升高望八极酒酣气亦振俯仰视遗迹飘忽如埃尘登临勿重
叹兹欢信可珍

游苏子美沧浪故园

昊穹积长阴寒日光炯碎虚步少城隅物色入遐睎苏侯故台沼芜没今谁记依依
故址存惨惨回飈厉谷传魑魅啸地失神灵卫伊人百夫特文采倾当世立朝罹网罗抱
影投荒裔阜淹天马逸韝困秋鹰鸢空余意气雄摩荡山岳锐生存且飘泊身后何嗟异
下泉虽冥冥精爽不可閤孤城千载归秋风九皋唳

登开元寺阁观浮海石佛

招提控城闉飞阁峙千尺白日转茏轡朱霞覆檐隙升高览万象目眩潜动魄天惊
洪漭悬地觉虚无辟阁中两金像竒姿斲山石当年浮巨海泛泛来中国未闻积水厚能
负万钧力瞽俗昧玄津至人示灵迹区区拯世心于道詎无益危坐睨隋唐浩劫一朝夕
檻前飞鸟逝户外流水疾九衢冠蓋場浮埃浩如积车马何时闲丹梯展良覲

金鳳花

灌木振凄风庶草浥零露懍秋兆摇落孤花表贞素萝生古径阴回立虚垣暮芳蕤
五色明幽丛九苞聚弱质抱殊姿高标秉修誉阿阁谁为容轩除自成趣鳳德谅未衰春
荣亦何慕

寄钱德钧德钧时在钱塘

骥騄动长嘶高鸿托孤影丈夫四方志焉能恋乡井忆昨行迈初严装在俄顷决眦

雪壑明矫睇云路永子行不我过数日怀耿耿曩与子成言窃比韩与邴清风塞寥廓高
谊破溟滓明知忽遐遗蒙谷谁予傲嗣宗诗酒放叔夜交游屏冲襟忆晤言夙暮发深省
载瞻吴洲月遥瞩孤山岭平生故旧心丹青共光景

赠竹径

青士抱奇节名与高人齐高人爱入谷对之忘朝饥千载嵇阮林往者六逸溪俗人
欲径造白日苍云迷今君在城郭种竹下成蹊比邻任来往不遣捶藩篱我自用法此
意人得知

梅隱院观鱼

窈窕转微径萧森见祇园密林已亭午宿雾始高骞地迴烦想灭景虚遐眺延升阶
启朱牖俯檻视清泉素鱖散苹藻文鲂媚漪涟水光忽破碎缤纷髻鬣翻无机蘊至乐物
微讵可捐伊余值良友追逐相聯翩观化聊假日达生终忘年匪慕惠施辨愿承庄叟言

寄汤师言倩德钧书数诗故章未及之

遠报平安如见君草生官舍不嫌贫山寒猿狖时相命江阔蛟螭夜有神诗句祇添
风土异酒杯莫放鬓毛新欲知别后嵇康懒一纸书题亦倩人

寓西隱庵师贤与唐月心相过分韵得然字

浪走黄尘祇自怜惠询前约竟茫然偶栖兰若耽幽趣转欲沧洲寄暮年草草诗篇
书柿叶萧萧鬓髮乱茶烟他时我醉君休去净扫禅斋共榻眠

赠日者余竹深

吾宗昔日丹阳尹不问主人过竹所奋然长啸振林樾满谷笙簧翠蛟舞我生嗜好
颇相似千古清风慚鼻祖余君谈天气吐虹白眼看人坐箕踞吾尝匹马造堂阶隔墙过
酒延我语知君旁舍竹如云借问林园得窥否君言我居安得此但有蓬莱绕环堵竹林
嵇阮太迫窄避世虽深触憎怒要当胷中有千晦世人那得知其处猗猗丛蓁比君子维
其似之美无度再歌淇澳为君饮醉倒犹能骑马去

胡西轩道院竹石

灵石越微云高篁啸飞雨解襟散幽寂清心见琳宇道人方燕坐碧鲜照巾屨客来
但对面庄视不得语如观温伯雪目击破千虑清风何方来泠然入窗户羣籁起虚谷众
妙会灵府飘飘紫鳳鸣萧瑟骊虬舞伊余堕尘网憧憧困驰骛神栖方外久梦绕云卧屢
永愿继壶公终当效巢父

题陆义斋香遠亭

汉广不可泳江永不可方遐观贞女游矫若惊鸿翔兹花亦如之曲池抱明妆绛袖
冰雪质翠衣云锦章褰裳欲往从宛在水中央修姱冶容灭闲都纖态昌倚檻回眺久俯
轩流涕长徘徊初月升仄浥零露瀼漠漠递幽馥悠悠播微芳相彼亦何心因风为飘扬

送汤师言赴杭

烜赫忠臣裔飞腾秀士英孝廉敦素履经术继家声邑校为官小儒风藉尔行礼还

周六典人见鲁诸生省署交章上天衢阔步亨溟池鲲速化丹穴鳳长鸣夙昔论襟谊殷勤结弟兄云泥惭异趣胶漆动深情敢望追王吉宁希荐祢衡湖山有奇句傥许寄柴荆
送潘鹤臞归侍母

冉冉虞渊月回光照我衣萧萧大堤马送客长鸣嘶穷冬霜雪繁陟冈行旅稀子何意浩荡归心如奋飞王粲故乡志江淹南浦悲丈夫各有适聚散焉可期子有白头亲天寒守重闺蟪蛄悬户牖知子行当归举觞慈颜和升轩福履绥士生食万鍾高堂色养违何如衡门下菽水欢逶迤羨子敦懿义家声良不亏闲居富词藻札翰时相贻

题束季博适安斋

萧萧虚楹暮冉冉飞云入纷纷车马尘悠悠讵能及凭轩亦何有竹树相蒙翳鸡鸣境逾廓鹤唳林更寂人生贵是身夫岂不愿适胡为悔吝端往往在衽席庄生叹坐忘陶令嗟形役兹理信无睽非君谅谁识

送王沂父常州学正

丰草被长堤春波转微绿江淹南浦情悠然在吾目吾乡二三友交谊天伦笃尔来数睽阻旦旦歌伐木陆生既高骞子亦展遐躅连游阳羨区并泛荆溪曲是邦号多士文风素云淑矧兹二贤教时雨新沾沐恭闻淑化原其机系庠塾呜呼季子风千祀今可复若予迟暮姿冥栖滞穷谷经素昧玄义漫费百回读宁希兼善才实愧闻见独载瞻双鳳翔高天引遐瞩

赠昆山儒医张生生携洛阳耆英图云图中名煮者某之始祖也

园公深谷隱巢父中林居生逢嘉运启尚拘曲士模岂若洛中叟抱材自卷舒诚着金铉职忠裨绣袞谟功成遂投绂身退斯悬车逍遥天地中优游日月徐相顾发皓白胥会情怡愉既应德星聚亦彰南极符一时聚冠蓋千祀存画图老成则已矣典型犹宛如张子有仍孙韬名仓扁徒种杏白云表蒔药青山隅利物贵兼济秉心良不渝咸俾迨尔祖永膺眉寿俱

赠禽衍陆生

征士士龙之子孙天马为驹气深厚逸才致遠谁能羈少年气已干牛斗尔来狼狽一缁袍豪荡肯居狐貉后文豹深藏雾雨蒙潜蛟终作风雷吼相狎塵市昔倾蓋执雉定交欢握手燕坐谈天试相诘系蛇掉尾还应首众人乃欲攘其瑜无异酰鸡喧瓮缶獬冠蝉弁戏推许鼠目麀头惭老丑嗟予退处操如蚓分与穷猿擅林藪虫飞蝠伏各有时万物行藏信非偶文章藻绘亦安用画虎不成徒类狗宁为牧猪隱菟博虽非待兔聊株守豸袖无堪厠朝列鹿门政可安农畝君不见千秋麟阁笑猕猴乌用丹青传不朽

过长安堰

霜落天清木叶零我劳王事赋宵征三更灯火鱼龙动千里星河雁鷺鸣大舶低昂衔尾进扁舟来往一身轻抱關恐有高人隱野客低头愧送迎

杭州客楼开炉日作

袖长起舞朱楼窄壶缺聴歌绿酒寒故国莼应归日老小春花在客中看江山信美
终心折风月横陈惜鬓残千古流传王粲赋令人登览动愁端

送汤师言番江书院山长

风土迢迢吴芮邑送君还忆旧羁栖芝山拥郭苍龙卧番水粘云白雁低遠道故因
劳梦想一官那得限东西野花芳草江南路千里秋风入马蹄

久出还家梅花已谢

手携长镵斲苍苔杂树无多取次栽斟酌何郎才思减梅花谢了却归来

梅花谢了却归来不见繁枝雪作堆桃李向来羞欲死而今红白满园开

梅花谢了却归来风里残英旋面回我似穰侯迟见事当时合筑避风台

和师言见寄【仆时丧制中】

千仞岗头亦振衣尘中祇伴白驹驰功名到手终安用忧患凌人竟大奇陶令田园
松菊废王袁冢墓栢杨悲新诗纵写高情极得似相看减梦思

静春堂诗集卷一

●钦定四库全书

静春堂诗集卷二

（元）袁易 撰

杭州道中言怀

涉世恒多故谋身转益迂马周聊逆旅阮藉岂穷途鹭宿依船尾枫凋落酒壶遠行
惓栗意对此不能无

白雾笼舟楫青山失画图往来迷咫尺收敛忽斯须野旷连飞鹘江清映浴鳬还将
明媚色且复慰征途

堤柳欹招缆汀花笑入舟高歌鳬鹄起阔视水云流牢落江淹恨飘零庾信愁都将
付尊酒短发得禁秋

忧患看飘瓦浮沉任转蓬题诗霜叶赤对酒烛花红嵇阮情何旷陶韦意未穷前贤
负高兴不必万人同

重午客中

往恨湘累遠他乡楚俗同流传存吊祭汨没见英雄竹叶于人绿榴花此日红未须
嗟旅泊吾道岂终穷

湖上冥冥雨和愁细似尘翠岚沾玉麈清润逼纶巾他日看浓抹兹晨效浅颦遂谙
山水意有为若留人

令节殊方客虚楼暮雨时何心吟铸镜余发欲成丝昌歆谁浮玉芳醪且满卮今朝
羁旅思更用独醒为

寄吴中诸友

钱德钧

风雨萧斋里鸡鸣夜向晨简编心力尽灯火鬓毛新余地知游刃何人解斲轮烦君
毋割席转漂暂埃尘

萧子中

并马春风陌高歌夜雨床追游前梦失漂泊此身忙绿酒西湖色冰肌六月凉难招
髯似戟来对玉成行

汤师言

卓行拘常调微官更数移君怀同弃屣吾道叹如丝濩落材高世飞腾命与时晚成
梁栋器剩破十年迟

唐希贤月心

枉策招寻密高谈谑浪俱他乡怀楚奏何日揽桓须白月垂文练青天落酒壶看君
话心事余子尽崎岖

赵明仲

共话巴山雨曾题华岳秋儒官虽寂寞公子足风流即拟同吴咏焉知效楚囚江南
新作赋寄尔恐添愁

冯景说

之子华簪裔箠瓢祇晏如为郎应驻辇延客愧无车早托襟期合能容礼法疎一灯
何日共料理读残书

和送春韵

浩歌击折玉妃簪独立东风思一襟桃萼带云归洞口柳花因雨老墙阴睡乡化蝶
三春梦客路闻鸥万里心犹有茂林觞咏处激湍不改晋时音

和月心韵

陋室仅容书满榻高车遂讶席为门溪山卜地關心近风雨翻江入梦繁乌雀浪传
佳客喜龙蛇新见醉啼痕何时重对萧萧竹细影参差过酒樽

送赵明仲番江书院长仆时自石洞书院归

诗酒欣欣同里社宦游那复共山川一朝奉檄虽云喜千里担簦祇自怜羨子飞腾
端在此顾余来往独翛然番江官暇无余事还许重来弄钓舡

首夏村居杂兴七絕

江花留我澹相娱沙鸟侵人狎易呼乘兴觥船时独往置身尘网欲何须
穿径幽篁破嫩苔遶池涨绿泼新醅薰黄梢蝶惊还起翠碧窥鱼去复来
问舍求田计已迟江乡别业漫委蛇春鉏属玉明人眼祇比辋川无好诗
迟暮耽书愧斲轮抛书聊憩梦中身翛然一榻谁相过祇有清风似故人
湾碕流水转微澜隐见游鯈荇藻间濠上难穷千古意柳阴聊得片时闲
泛泛鵝鵲渺渺波烟消日出聽渔歌江天物色无人共城郭风尘柰我何
绿树荆扉晚更幽鲈鱼菰菜近堪求故人有兴能寻我但觅吴淞欲尽头

八月一日雨后赋兼寄城中诸友

今我不乐思出游宿酒昏昏仍懒惰安得凉飙破烦郁竹头抢地桐阴妥纨扇那能
脱腕挥纱巾不觉酣眠堕谁唤飞云起天末政用此时持赠我渴龙掉尾下饮江列缺为
右丰隆左蜿蜒初若弥六合变灭忽复成么么长江收暝净千顷落日着山县半筇白衣
苍狗觉虚无孤鹜断霞明细琐人生万事风雨散苦欲控抟无一可嗟予学道良已晚阅
世忘忧今亦颇西畴■〈禾罢〉稊碧参差南埭芙蓉红婀娜聊寻清景日追逐别复川
原秋澹沱故人城郭尚留连何时共鼓吴淞柁

呈信州孟能静总管

设官重邦牧宣化驰皇风师师汉百僚独推黄与龚金章映紫绶非材焉所蒙君侯
上宰裔树立何穹崇神驹籀云雾威凤下椅桐昔在英妙日已谒明光宫髭髦拜玉陛秀
骨回重瞳帝并持一麾往哉懋汝功屡考上治最野辟蕃春农及兹三锡命厚恩零露浓
上饶古名郡穰穰庶物丰诛求入豪吏税敛或缺供朱旛一戾止起弊如转蓬坐闻襦袴
歌喧呼走儿童侯尝过吴下五马声隆隆吾友具朗鉴揖侯广坐中褚裒得孟嘉千载事
畧同伊予慕清裁欲见嗟何从自怜七尺躯仰愧高飞鸿

题钱德钧水邨图子昂仲宾二公作竹石于后

无多茅屋沧波遶一半青山竹树遮宛似吾乡荒寂地直疑割我白鸥沙
枝叶翛然长带雨坡陀幽处欲飘云故将竹石期贞士二子风流最絶羣
题渡海罗汉像

锡飞自有天龙护杯渡能令海若趋屑屑往来应自笑区区变幻欲何须
冬日感兴并怀德钧师言月心

日带寒阴暝云含雪意稠饥乌啼欲下鸣雁去安投物态關身近年光入鬓流低头
频览镜勋业付悠悠

散帙蟬鱼走挑灯黠鼠窥温寻经岁读感激长年悲糟粕求玄理芝兰借故知三冬
开万卷须访董生帷

短褐黄埃积高堂绛帐开东西成契阔岁月转低徊青稍还衰柳红初注小梅城南
有幽事兴发可能来

之子数相顾谈谐写我忧每怜高谊激端向古人求玉笋流泉酒青旗瞰水楼邀君
兴飞动已解鵷鷺裘

杭州长至日会戴师爽张仲宾

贞元朝士今遗老南渡王孙不乏贤二妙聯翩今拱璧一官留落尚无毡笑谈政用
迎阳复汲引悬知到日邊挥翰玉堂如问我短蓑黄犢乱春烟

长歌弹铗日为年昼晷何堪一线添归艇有时终入手清尊对客漫掀髯云阴欲落
平垂地山色相新稍近檐人散凭高聊发兴半空楼阁雨纖纖

次日雪中再用前韵

岁晚敝裘惭久客雪中僵卧愧高贤强呼竹叶开金盞细看杨花糝白毡列壑含春人未觉一江趋海势无边若为乘兴寻安道十幅蒲帆破暮烟

故人要我久忘年我亦相逢意气添欲唤娉婷歌白雪恰惊点缀入苍髯留连冰柱烦诗笔零乱天花入帽檐待取明朝残酒醒越山重看翠眉纤

正月十六日与德钧子敬翼之泊儿子震游束季博山园赋诗五首

我爱山园好芳堂隐薜萝野云栖不去风叶扫还多暂憩忘城郭长谣咏涧阿不嫌频启钥重过意如何

我爱山园好幽篁积翠重会令栖彩凤勿遣化苍龙清影参差久高标邂逅逢未须猜径造聊复效吾宗

我爱山园好峯岚绝垢氛石痕常积雨洞穴细飘云醉卧移时醒晨游送夕曛数椽吾拟卜半席可能分

我爱山园好清池漾细涟幽花欹半笑野鹭睡相聩每醉容山简因诗忆惠连更期春雨歇来对碧漪涟

我爱山园好兼怀地主贤兴同招隐赋文继补亡篇坐纳千峰秀无如一壑专斯游偶不见欲去意悠然

病目废书雨中独卧偶赋

澹墨秋阴暗满川高山丛竹乱风烟淋浪稍觉天瓢泻飞洒还惊瀑布悬病睫朦胧妨远眺闲身衰谢竟谁怜祇应造物谙疎懒乞与萧斋听雨眠

迟暮耽书祇叹嗟更怜阿堵着昏花形容未怕参军笑方术徒烦坐客夸绡帙暂抛尘烂熳青灯故照发苍华衰慵目断今如此知复何年究五车

村径无人喧鸟雀衡门积雨散逢蒿频拈药裹封题懒独处藜床偃卧高幻翳本空终扫灭秋容新沐试游遨为凭汤慰相料理欲数青冥玉兔毫

湖上即事多怀月心之辞

月转山横湖水明星河倒影玉壶冰故人天末难持寄来倚高楼第四层
浙东山色渡江青眼底新诗向此成天尽云低看鹄落日斜风细待潮生
顾盼江湖左右分吴山飞雨越山云兹游览结风烟秀独自题诗转忆君
卷地杨花作雪飞来时弄色尚依依不知华发添青镜漫道缁尘染素衣
送罢东风身是客午窗半对紫玫瑰家山枕上分明见何处浓香唤梦回
拄腹芬芳万卷余剧谈痛饮亦时须怜君独抱诗笺注颇忆城南旧酒徒
题扇

千古钱塘佳丽地名花一朵满城春樊川已老何堪赋苏小虽亡更有人
飞燕惊鸿拟未真飘飘真欲似行云入舟山色羞眉黛隔岸榴花避舞裙
倚扇风流已绝羣西湖小却欲飞云不知身是杭州客一曲清歌带酒闻
唾壶

同抱尊壘质蒙将沃盥俱敢论才不器得近唾成珠弃置枵然大提携醉后须长歌
空击缺牢落壮心孤

灯檠

雁足形模小犹存汉制微低悬花烬密故照鬓毛稀岂忍捐墙角何须对烛围露萤
干死后岁晚澹相依

麈尾

王谢风流物翩然落手中玄谈方亹亹旧掷莫忽忽拂席青蝇避障尘白羽同空言
移晋鼎千载累清风

铁如意

犀玉夸纖巧那堪缓急须晶荧同剑铎玩弄避珊瑚谁解麾戎垒徒能击唾壶持将
拟诸葛碌碌笑狂夫

白海青

尚方有赐江浙省臣白海青者杭州人士美以歌诗征余同赋

渺渺东溟刷羽翰乍随天马万人观孤飞雪点青云破一击秋生玉宇宽赐予岂将
追雁鹜驰驱直欲辨臬鸢江南明月虽同色梦想瑶阶白露溥

寄孔退之

昔从茂苑观为政江动云飞五月秋已识威名弥属望相看谈笑更风流才华祇解
逢人说薄劣真惭与子游遥对青山忆丰度几回独倚仲宣楼

静春堂诗集卷二

●钦定四库全书

静春堂诗集卷三

（元）袁易 撰

上张大学士

玉节飘飘拂锦鞯宫袍犹带御炉烟承恩始觉词臣贵问俗争迎使者先近侍鸣珂
依日月南游染翰动山川更须一试调元手烂熳为霖下九天

春日雪中

萧斋听寒雨出户霰已集飞英点砌销绿苔稍沾湿纷纷渐填委势若包原隰冥观
阴阳妙欲张故先歛定知陈荳下已有春风入

危坐愁苦思急雪鸣窓棐碧筠助萧瑟音响有余清啾啾寒雀聚肃肃高鸿惊抚物
易感兴浊醪时一倾独酌谁寤歌闲襟徒自盈

穷居散书帙闭门风雪中圣贤有遗意眇邈殆难通千秋纸上尘欲论谁与同掩卷
且须卧时聆响幽丛孤怀偶便静敢慕高人踪

春日自城南归会二友观书人散后作

花柳垂垂放风烟澹澹晴路长闲信马春浅未闻莺心与游丝远兴随吹笛生欲携

尊酒去对取乱山倾

二仲能相过惭非蒋诩居麈毛频落饭蠹叶乱翻书胶合精神际珠生咳唾余骊驹
惜轻赋幽兴晚萧疎

春日游废园

种花移竹为谁营过眼风烟祇暗惊试数旧题奇石少尚论他日曲池平垂杨卧水
傲傲舞细草侵阶故故生偶与春光共流转绿尊对此竟须倾

和师言游南园韵

竹里亭台纳翠光席邊泉石坐仙乡惊飞水鸟争鱼出吹尽林花草自香谁把洞箫
吟嶰谷似聽邻笛在山阳諷君诗句云烟动转觉苍崖晚更苍【是日坐上有吹洞箫者】

送孔退之

笑谈玉塵清风起手滑冰壶雪片虚信宿暫疎情已恶数州相望意何如江淹别恨
苍茫外阮籍穷途潦倒余目送故人犹作客明朝怀抱向谁舒

送蔡松江之饶州石洞书院

寂歷双峯弦诵室遗书长共白云扃絕怜皓首窥章句不似青山见典型随牒非才
心自愧同僚得子眼还醒鱣堂会有千人聽細聽传家旧石经

送楼山长之石洞交代

昔贤遗绪何寥阔欲振高风愧不能深喜君才逾十倍岂徒吾事得交承钱塘倾盖
江湖动南浦扬帆曙色凝行矣莫辞千里遠百年礼乐待君兴

与师言客钱塘凡三月余师言归后作诗奉寄

灯花犹记别时红为报君归我亦东岂意黄尘迷瘦马尚淹青眼送飞鸿羣山积雪
清相射千树寒梅望欲空何逊扬州才思减试烦妙语喚春风

寒食日南山招饮马塋醉为马坠

钱塘西湖天下奇寒日清明风日美山开锦绣身入画舟近丝簧春入耳上人发兴
流俗表携客看花古塋里委蛇微径出荒芜繚绕重峦当燕几遠寻桃萼失红霞稍觉风
光在流水赏心尚及答芳晨倾盖何期遇知己晋人禊事得同然介子高风嗟已矣山悬
落日为人欢酒尽青尊遮客起坠马常吟杜甫词坠车今悟庄周旨养生被戮几自解以
酒得全探妙理今我不乐复何为人人生如斯良有几鸞峰苍翠尚招邀已分青鞋从此始
与南山伯祥会饮湖中暮归书所见

绛袖维舟并清湖满镜愁目成千里近曲罢数峯留寄语凭青鸟知机避白鸥东邻
窥宋久邂逅亦风流

风尘天际客弦管道邊楼良夜苦无月殊乡应更愁精深鍾子聽潇洒遠公游颇念
羈栖否飞花点敝裘

自钱塘归寄诸友

苍崖环抱汀洲口皋亭蜿蜒绕其后势如奔马赴平川
轡銜约住惊回首折旋起复固多态跋涉往来看亦久不烦
山色笑相迎今日扁舟落吾手旷野萧萧残雪净长堤活
活春流走鸣橹宁嫌乱鹅鹭挂帆似欲穷牛斗飙风忽怒当
夜分天毕定知为月守纵横雨脚散书卷澎湃波声撼窓牖
未须戏侮出恶剧已厌奔驰谢衰朽钱塘留住春复秋千首
高吟负花柳雕镌拟效西子顰刻划肯堕无盐丑角端羞与
蛮触伍胥次不妨云梦九秋毫得丧良可笑百岁风灯定何
有已矣归乘下泽车悠然更泻新丰酒数尺白鱼髻欲奋三
寸黄柑香半剖迺来梦境过眼空愈识天公于我厚垂虹在
望渺烟水倦翼知还认林蕝汤君文妙不加点唐子酒酣初
抚缶亦知晤语渐有涯邈来相就还能否若人折简不可
招寄与篇诗换琼玖

自杭还吴访德钧因留论文过午归途过竹间道院

城郭尘埃傍马飞此中何地顿能奇萧萧残雪鸦翻急漠漠
平田鹭下迟水带冰渐流窸窣路随篱落转逶迤直疑身在
宜城畔野店山桥映酒旗

晓蹋雪泥寒未解暮归沮洳稍沾裳已惊康乐春生笔更伴
弥明睡倚墙共话祇添眉睫喜相看莫问鬓毛苍从今来往
城南道藜杖东风百草香

送屠存博去岁客杭一年多与存博游故诗意及之

百尺朱楼花照天十分金盞酒如泉共聽风雪当今夕却
话湖山记往年身世薄游那可料鬓毛相顾各堪怜惭无贺
老风流趣苦欲淹留更系船

邀师言过城南隐居不肯来已而雪作并寄姚子敬

岁云暮矣冻雨零南山密云如环城闭门读书华发生坐
与岁月俱峥嵘哀鸿昼啼各相命吾亦求友纾吾情街衢扬
尘纷莫扫一笑相逢几絕倒丈夫意气胶在漆白璧明珠岂
为寶城南浊醪贱如土地僻丛梅似繁縠割鲜那得效膏粱
接燕聊将慰枯槁具区美菜菹半绿大谷雪梨寒更好苦邀
鞭轡不可回念子取别何草草归来怀抱为谁开奇事咄咄
令人猜初惊竹树声槭槭旋觉庭户光皛皛飞絮散盐儿女
语雪车冰柱犹堪吟惠连赋笔亦何事徒藉司马烦邹枚法
当对此但饮酒慎勿刻划琼与瑰明朝东风土膏释百鸟喧
啾破幽寂杖藜禅榻烟绕鬓问柳湾碕春动色东郭履穿君
莫叹北海尊深我安惜一时会合犹少靳百年胶轡终何益
思君定卜晏子邻书声灯光夜穿壁焉能终日心拳拳长倚
城南望城北

题钱翼之所藏华岳山水图

窓含遠岭绵绵树门对清江个个船此景吾庐朝暮有画
中忽见絕堪怜

次师言月夜见寄韵

暮烟销尽月东出明镜团团飞上天欲向青冥穷遠目不
堪光彩照华颠金尊翠勺期何夕紫绮乌纱忆少年诗句
唤醒千古梦南楼风物故依然

春雨漫兴

日日春阴祇欲眠强寻南陌复东阡犹残碧树花多少莫
惜金尊酒十千象管乌丝

题往事玉箫锦瑟负华年愁来祇对西山坐卷起疎帘翠接天

江上平芜望欲迷江邊密雨细如丝冥冥白昼飞花急漠漠青林度鸟迟春事又当三月暮人生那得百年期谁能苦惜纒头锦唤起娇娆舞柘枝

积雨厌厌愁断肠暂晴犹得见春阳频来幽鸟当窓语半落闲花度水香彩笔雕零诗漫兴金杯摇荡酒生光悠悠心绪浑抛却付与游丝共短长

和师言首夏杂兴并用书怀

四月家家转黍鸣东冈南埭半阴晴春兼落絮随流水风引游丝入太清浮世时时尘事接荒郊日日暮山横能来相就同鸡黍垄上何辞暂辍耕

柳花如雪填门巷不到先生绛帐深伏枥暂淹千里足耽书闲寄百年心乍抛酒盏愁侵鬓忽枉诗篇兴满襟祇欲笼将鹅自去看君醉墨写来禽

百年未放鬓毛斑更复求谁似我顽山鬼吹灯风雨里渔人争席水云间采苹聊出经南涧攀桂因留赋小山薄劣敢同高士趣身如飞鸟倦知还

雨后寄陆小山

飞雨鸣檐似决渠高歌终日意何如但知书尽五车读那问家无儋石储尚忆堂阶曾系马近传釜灶欲生鱼解颐祇拟寻匡鼎满腹穷愁得破除

闭门十日萧萧雨裹饭何人问子桑孤坐性便松桂冷高歌声出薜萝长忽贻短札愁仍破更读新书喜欲狂安得从君共清啸祇应容我据胡床

和小山雨中见寄

滑滑泥中啼野禽东阡南陌复霖霖入空漠漠连平楚竟夕冥冥失故岑仲蔚门前荒草合子真谷口乱云深栖迟不作干时计空蕴经纶一寸心

江永浮天接混茫无船可买系篱傍欲窥七泽穷三楚但见一云连八荒绛帐高堂深莫到苍崖远树郁相望访君不待帆樯具河广犹传苇可杭

和师言穷居即事韵

城郭烟花裹屋庐萧然谁识范莱芜借居种竹怜君达筑室移山笑我愚坐久眼看鸟几旋醉来头向墨池濡壮心纵复都销尽未害狂歌击唾壶【来诗有壮心触事渐消磨之句】

雨声连夕乱鸣檐野色今朝稍入帘绿树成围黄鸟度青天欲尽白波粘熊经懒戲愁危坐鹄语无凭喜谩占若话浮名身外事画蛇无足不须添

野水侵扉水满坡萧萧铁砚久慵磨忽传翡翠鲸鱼句惊见珊瑚碧树柯深喜交情期管鲍敢将诗律斗阴何倩谁写向高堂壁醉后长歌复短歌

再次前韵

浮生处处可为庐胜境非人地亦芜笠泽昔因高士重冉溪曾为放臣愚怜君噪吻哦诗苦笑我枯肠藉酒濡若问神仙醉乡近枉寻圆峤与方壶

醉里花枝拂帽檐醒来花落鸟窥帘林园秉烛须行乐日月煎胶可解粘梦鹿生涯

身转误维鱼岁事兆难占长江安得成春酒痛饮杯干自可添

北窗无梦到銮坡寸墨寧堪盾鼻磨任性祇应同社栢怡颜聊复眄庭柯琴从得趣
无弦久酒可忘忧如醉何诗句粗疎君莫笑江湖付与竹枝歌

题画

来禽

离离玉井露光溥移得精神画里看更待秋风红颗烂墙阴狼藉鸟衔残
瓜

故侯一日声名隱翠蔓千年采摘频为问金盘供错落何如秋圃卧轮困

黄葵

忆昔茱萸花下饮金杯春艷绿鬟欹祇今花似金杯侧独对西风咏折枝

杏花

拟赋春风碎锦枝含毫无句入支頤赵村当日花千树白傅风流大好诗

题钱仲昭家菊坡图

红紫纷纷总后尘十年陶令可相亲不知坡上秋多少展卷霜风欲拂人【仲昭居
风宪故云】

静春堂诗集卷三

●钦定四库全书

静春堂诗集卷四

（元）袁易 撰

新岁郊居即事

白日无遗照青春入敝庐屠苏慚后饮桃梗伴闲居荒僻逢迎少衰慵拜起徐占年
听鸡卜吾得把犁鉏

云叶开清旭霜花散积阴稍欣回冻泽已觉变鸣禽物化争流疾天机静玩深东风
渐相顾来往补疎林

岸帻江皋久移筇野望新草倾将落日树里欲回春暖晒随阳羽晴翻在藻鳞自今
还往数鱼鸟亦相亲

村居即事

亭皋独立看云移并觉青山入杖藜汀草路穷争地出水禽日落向人啼百年小饮
身如寄万象横陈句懒题驱使风光诗烂熳令人苦忆浣花溪

村北村南鸣水车直疑树杪着浮槎因居泽国忧农事强起江天管物华当户漫栽
彭泽柳何田宜种邵平瓜悠悠作计全疎懒倒罢清尊又日斜

睡起西山翠作堆蜿蜒浑欲傍人来政愁尘土无诗句已觉风烟扑酒杯清景弥年
供啸傲浮生何事苦低徊谁能共此悠然意冉冉斜阳白鸟回

寄陆冶僊

寄语云间陆士龙近来谈笑与谁同
圆机往往论千古浊酒时时判一锺
闻道新居营水竹颇胜穷巷散蒿蓬
驱驰城郭还知否江水桃花昨夜风

和小山夏夜独坐

密竹通风细新荷贴水圆
林塘涵倒景河汉转高天
有兴栖霞外无愁到酒边
何烦百钱卜已悟小行年

屋角天河白寻源去匪遥
祇应广寒阙共此可怜宵
北斗回空阔清风起沆寥
蹇蹇何处觅吾欲泛轻舸

胶漆存吾道高情宿昔同
神交怀阮藉夜饮忆元忠
两地牛鸣近何时马首东
酒酣君勿去待我浩歌终

卧石云粘袖乘舟月入蓬
物华归目睫诗句愈头风
有喜成三益毋劳叹五穷
昔贤倾意气安用万人同

漫浪鸥为侣行藏鷁退飞
秋侵蒲柳质月满薜萝衣
零露浓如泻闲云薄未归
思君共挥麈相对澹忘机

漏水催传箭繁星拱建杓
菰蒲终夜响魴鱖傍人跳
篇什何多兴风光颇困嘲
胡床谈咏处着我醉喧嚣

夜久琴书冷楼高枕簟清
微风过梧叶故作雨来声
浊酒悠然酌新诗向此成
残杯犹在手鼻息已雷鸣

高卧北窗里无因梦益州
行吟风满袖醉舞月窥楼
倒载惭山简清歌无杜秋
远游须借问何地可埋忧

浪迹供多病牢愁伴独醒
歌长聊自舞诗好欲谁听
老马元西极游鷁且北溟
赖君时慰我喜变发星星

因公事留驿中遂登姑苏台晚望

古驿西风起中含水国秋
官闲公馆静鸟下吏人休
移簟微凉入登台晚兴留
乱蝉当槛急众木抱城稠
天迴转苍鹘山横走翠虬
虚无疑地尽突兀并云浮
絶景嗟才窘微吟怯语遒
烟霏生变态鸥鹭傲冥搜
初月清如湿残霞散不收
似乘牛渚舫若在武昌楼
娃馆今荒草吴宫祇废丘
按图非旧迹访古莫深愁
苹浦渔歌断枫根鬼唱幽
掠檐闻鹤警照席数萤流
止舍惭昭子投亭愧褚裒
衰疎顽能稍稍漂转付悠
悠兹字阅人久伊谁似我
俦途穷翻一笑鬓短耐千
忧世故从飘瓦浮生等置
邮三更星斗落万事入搔
头

秋夜怀友

平生故旧谁知我潦倒襟
期子畧同纵酒祇拚千日
醉读书少忍十年穷岁华
晚晚欺霜鬓物色凄凉入
井桐未用相看叹摇落古
来江汉有秋风

屋角阑干北斗垂谁家长
笛夜深吹月流河汉天机
急秋到山川木叶知老去
潘生聊漫赋向来宋玉不
胜悲四时代谢浑闲事有
底穷愁入两眉

和翼之秋怀

衡门无马迹露草有虫鸣楼上谁家女穿针闻笑声胡床歌处稳长笛醉来横此际
得吾子掀髯纱帽倾

再和

千林羣鸟静两地一牛鸣月里山河影风前鼓角声川原秋浩荡云物暮纵横此夕
□□□□□且细倾

赠周生

人生身幸一丘足豫卜佳城也是贤甚欲与君论此事祇今未办买山钱
戏调月心

药囊近说蛛丝绕酒戒兼闻翠袖开绛帐生徒何日了秋花池阁唤人来
淡月微云相与清思君诗句卧中庭谁谓西风不解意墙根吹散读书萤
南园花竹清如洗每到徘徊不拟还办取拍浮三百斛醉乡堂上破除闲
南荡东陂烂熳秋问君底事不来游身如槁木书堆案相伴蠹鱼何日休
扣门载酒可容来怀抱相看得好开祇恐彭宣惊女乐后堂丝竹一时回
送府判常仲宽

鱼鳞邑井古勾吴地控东南拥具区别乘向来犹半刺连衙况复共分符雄藩专辖
劳参佐属邑安居罢叫呼去日翛然旧行旅但添霜雪上髭须

凝神万事优游里文翰如山不惮烦久淹朱绂从千骑垂上青云更二藩祖道攀船
歌宛转秋风卷旆看飞翻胸中歴歴知民瘼台阁从容好细论

送赵显之检校

宪府昔淹从事衫携书又问淞河帆湖山楼阁秋千仞省闕文符日几函稍纠掾曹
疏冗剧时要宾客上嶰岩兰台只恐催轺转崖石今题是旧衙

挽陈彻堂

累世仍簪绂高名被搢绅贰车回步勇真馆宿心亲凋落嗟前哲参陪阻后尘襄阳
耆旧传记述付何人

高贤遂如此忽忽死生分竟失昆冈玉祇残太华云人间空作谏地下定修文不谓
贞元老今为马鬣坟

黄壤千年墓瑶芝一夜霜病初传稍稍身已去堂堂有子翁堪瞑知生我亦伤白头
流辈尽谁表郑公乡

陈仲渊别室

一桁朱帘护绮疏数拳苍石蔓寒蒲汝南市上尘如雾谁见仙人隐玉壶
粉垣密掩竹修修时见清风舞翠虬若讶此君嫌俗客祇开三径纳羊裘
冰壶玉盘粲炯炯清泉堕石寒冷冷羞将白发三千丈来对灵苗一寸青
方瞳绿发照寒碧冉冉云气生裳衣不辞乞汝服食法但恐石上龙蛇飞
琴中流水澜翻落画里秋山杂沓来□□□□傍修竹卧看饥鹤啄莓苔

别南山上人

扰扰人间万事非相从时得扣玄机林堂酒半月到席竹院棊残云满衣浮世情缘
虽已解丈夫意气忍轻违费家池上沾巾处此道今无古亦稀

折松为麈论如流落尽松花语未休岂但近公如白雪便应着我寄沧洲粗疎颇慕
嵇康懒薄劣难追惠远游他日重寻黄叶寺碧云吟罢不胜愁

独坐怀黄子久

衡门处穷巷蓬蒿散空垣卧起但书帙往来寡车辕独謡谁与和风叶一骚怨茅櫺
日可爱南窓明更喧苍筠送修影忽作蛇龙翻人生耳目娱岂在声色间欣然会心处欲
写竟忘言

良友多隔阔邈若参与商众中见快士蔚然江夏黄词章发华藻眉目婉清扬如瞻
晨星辉烨烨吐寒芒相逢车马遶俗尘不可障欲申慷慨怀告别复忽忙具区蕝泽深高
天云露长愿为双鸿鹄与子俱飞翔

郊居寓目随事辄题得诗九首

雨洗万象出暄和风日新鸥声新命侣山色暮迎人
絶江捕寒鱼赤鯿巨莫逃鯪鲙翻有神腾出如银刀
杂英浑末吐弱柳不胜垂独得春风意黄金捻作丝
罢钓坐盘石水清石粼粼鉴影见毛发吾今非昔人
春风号树穴达曙箫笳声残梅几点雪犹复照人明
把酒清江上扁舟送夕晖行云杯里度白鸟镜中飞
泱泱堰根水跳珠终日鸣班荆坐忘返中有激湍声
干鹊构危巢拾薪来往飞拮据有余闲犹报行人归
人生百忧集心役鬓毛斑烟雨江南岸春鉏尔许间
和师言病中止酒见寄韵

怜君止酒婴何疾犹复题诗枉故交三月青春看又破数茎白发若为抛已鉏宿草
留微径肯踏泥途过远郊唤取载眉开一醉鼓簧调暖玉笙匏

题赵明仲鄱阳行藁后

新诗别后顿能奇笔势翩翩直欲飞但怪衣巾清气袭尽持山郭白云归应刘沦落
词人少徐庾雕镌雅道微拂拭朱弦谁共聴似君高趣眼中稀

春日对雪即事寄师言

落梅和雪作团飞斗舞回风不自持岂但燕莺寒敛翼顿令桃李澹无姿梁园赏罢
须重赋水部题残更有诗料理物华烦妙笔唤回春色乞花枝

次月心见寄书怀

世故婴我怀俗念令人老解忧聊用酒人讥有何好君诗出奇瑰珊瑚间瑶草宛如
对长髯清谈吾絶倒

藜床膝穿穴卧起翻故书僵立困僮仆传抄愁小胥兀兀竟何事新妇闭一车敢慕
陈元龙豪气犹未除

今日风日好嘉辰嗟离羣小桃繁似火江水碧于云我独掩闕卧无客为书裙但闻
松风号萧爽如秋旻【小斋有松数株】

三月一日过南园报师言诸友

素李花繁不见天绿杨气暖欲生烟飞泉漱口清如玉细草留人软胜绵
数日春阴一日风海棠只拟向来红南园昨暮浑成雪犹赖相看是醉中
柳花吹破百花休及此吾当秉烛游辛苦虞卿缘底事满窓白日照穷愁
再用韵

崇桃积李照青天乳燕鸣鸠隔暖烟漫道游丝高百尺祇应春思更绵绵
落花池馆鸟呼风狼籍蔷薇半丈红何处飞来双燕子与人相对寂寥中
清谈难觅许文休欸段聊追马少游办取拍浮三万斛莫令酒尽作春愁
和师言残春漫兴韵

登临特地起长嗟烟树依依减物华岁去祇添新白发春归犹问续开花懒为二顷
求田计悉送千钱留酒家端肯忘机同钓席乱鸥如雪满平沙

城东云木翠相望城里飞尘自在忙万顷江波摇鸭绿百壶春酒泻鹅黄野禽忽送
尊前曲水荇时飘镜里香只少红妆同彩舫清溪白石聽鸣榔

静春堂诗集卷四

●静春堂诗集原跋

静春诗似黄陈学杜徃徃以苍硬盘郁出之当是去宋未遥不染元人纖靡之习耳
八月一日雨后七古一篇意气摆脱才情奔放具体大苏矣钞本多讹字改定觉眼界爽
朗谁云误书思之更是一适邪丁未七月二十七日半村学人厉鹗记